

QVÆSTIO MEDICA.
QVOD LIBETARIIS DISPUTATIONIBVS MANE DISCVTIENDA
IN SCHOLIS MEDICORVM DIE IOVIS XII. FEBRVARII,
M. PETRO CONSTANT, Doctore Medico, moderatore.

An qui Galeati nascuntur fortuniores?

837

NASCENDI, intereundique lex vnica & æqualis consuetudo omnibus hominibus data est: viuendi verò modi pene infiniti, temperiei, morum & animorum non minor quam vultus & faciei diuersitas, nec ab aliis orta principijs obseruari potest: corporis, animi & fortunæ dotes mensurâ inæquali singulis hominibus dispensantur. Nemo tamen ideo sorte vel fato felix aut miser æstimari debet; sapientia fati & fortunæ aut nescia, aut domina, quam regit vitam, ab vtriusque iure iniuriisque vindicat. Quisquis igitur sapiens est, securâ nauigat arte, fortunamque suo temperet arbitrio.

QVAM quisque optarit fortunam, eam nihil impedit quominus sibi adsciscat: volentem sequi, ducit labor improbus, nolentem trahit: si tamen optato sine non potitur, id neque fati, neque astri, neque sortis cuiuslibet, sed solâ suâ culpâ euenit: artem namque *ἐντυχίη*: inertiam, *ἀνυχίη* sequitur: solâ ignorantia fortunæ mancipia creat, virtus sapientiz premium est. Sapiens autem quisquis est, ita acrem in omnes partes aciem intendit, vt semper videat sedem sibi ac locum, sine molestia atque angore viuendi, & quemcunque casum fortuna inuexerit, hunc captè & quietè ferat, non contabescat molestiis, timore frangatur, nec scienter quid appetens ardeat desiderio, nec alacritate futili gestiens deliquescat.

MEMBRANÆ (quæ si generationem partium spectes, nullis sunt posteriores, ne cordi quidem *πρωτοπλαστῆς*, hepatis aut cerebro; si vsu, omnibus priores existunt, omnes enim contra externas iniurias tuentes communi vinculo nectunt & *ὀλομελής, συντιμωρίας* & *ἀνιδιόσεως* cuiuscunque apposita organa fiunt) duæ tantum in humano foetu deprehenduntur chorion & amnion, quas ex femine & sanguine virtus formatrix educit; neque enim antiquorum medicorum temporibus innotuerat placenta, nec nostris allantois in homine vnquam deprehensa fuit. Illa siquidem vasa fulciat, vmbilicalia vterinis annectat (nullo tamen cotyledonum interuentu) & sanguinem quoquomodo elaboret, non tam tunica, quam pancreatis aut iccoris vterini nomen merebitur: hæc zonæ in modum chorio exporrecta, animalia quælibet vtriusque dentata per medium corporis in vtero cingit.

QVALIS est nodorum vmbilici vis & energia ad fecunditatem, talis est & galeæ ad felicitatem: at nodorum neque numerus, neque color, neque interualla, quibus inter se designantur, quidpiam certi circa conceptuum numerum, sexum & interualla denotant: imò quicquid de illis circumferri solet, solâ Pythagoreorum superstitione, aut vanitate Arabum non rei veritate fulcitur. Non est quidpiam ab amnio separatum galea, nec si eiusmodi foret, maiorem infanti felicitatem portenderet: vnde faciles sunt in credendo, non in perorando felices, quicunque eiusmodi pelliculæ interuentu mira se in declamando præstituros autumant.

QVONIAM verò nemo fortunatus nisi sanus, nemo sanus, nisi cui mens sana in corpore sano, nemini denique mens sana cum corpore sano contingit, nisi temperato, in quo humores mensurâ æquabili & proportionem *ἡμετέριον* æstimandâ, dispensari solent; sanè quicquid humorum proportionem mensuramue promouebit, aut conseruabit, illud animæ firmitatem, corpori robur, vtrique sanitatem, & homini fortunam conciliabit. Vnde cum galea nihil planè ad humorum mixtionem conferat, nihil animæ corporique addat (quæ quidquid in agendo conferunt, id totum temperamento debent) nihil quoque faciat ad nascentium fortunam necesse est.

Non ergo qui Galeati nascuntur fortuniores.

Proponebat Lutetiæ **ROBERTVS DEBONNAIRE**, Ambianus. **A. R. S. H. M. DC. XXXVII.**

DOMINI DOCTORES DISPUTAVRI.

M. Petrus Guenaut.
M. Nicolaus Braier.
M. Cyprianus Hubaut.

M. Guido Per.
M. Iacobus Tournier.
M. Urbanus Bouché Med. Reg.

M. Dionysius Guerin.
M. Ioannes Riolan Prof. & Med. Reg. & Regine Maris Archiat.
M. Michael Toutain.

